

第十二冊

叢桂草堂醫案

黃澹翁醫案

診餘舉隅錄

也是山人醫案

龍砂八家醫案

邵氏醫案

沈氏醫案

青霞醫案

素圃醫案

掃葉莊醫案

裘吉生主編

珍本醫書集成

袁桂生著

叢桂草堂醫案

世界書局印行



序

先大父秀山公云。老醫斷病如老吏斷獄。善斷病者必善治病。前哲陸九芝云。案者斷也。方者法也。惟能斷而有法。乃可稱方案。旨哉言乎。夫吾國醫學之發明。其源古矣。周秦時代。醫師診病之法。大率注重於氣色脈候。聽聲寫形。詳見素靈難經。後漢張仲景崛起。於望鼻色目色外。更注意語聲呼吸以參合脈候症狀。六朝至唐。如褚彥道孫思邈輩。則又重在明症候詢嗜好。管致疾之由來。辨病臟之虛實。相其老壯。酌其淺深。歸本於博涉多診。屢用三端。此周秦以迄晉唐。診斷術之大略也。厥後金元四大家。暨明之韓天爵陶節庵等。名醫薈起。則又兼審風土時令。以決病之陰陽燥濕。且兼施腹診之法。佐望聞問切四診之不逮。是又視周秦漢晉之時加詳矣。清初江右喻嘉言出。乃主張先議病。後議藥。取古人診病之法而融會貫通之。凡風土時令。體質肥瘦。年齡長幼。病之新久。以及情志苦樂。脈症現狀。莫不辨析毫芒。以審定其陰陽虛實。外感內傷。上下表裏。何臟何腑。何因何症。然後採用古人七方中何方。十劑中何劑。規則謹嚴。有條不紊。蓋至是而吾國醫師診病。乃有一定之規則。而顛預鹵莽妄投藥餌之弊。賴以廓清。誠萬世不祧之良法也。今日東西醫家。號稱爲實質的學派。解剖的智識。而竊觀其診斷一方。多憑官能的診斷。及尿之外觀沉渣。與糞便咯痰。舌苔外貌。眼勢體溫體量。及器械上診管之所得。其間泰半與吾國古法相通。然後歎中醫診斷術之精妙。殊未遜於西人。雖器械之用未備。而脈診望診問診腹診之法既精。則亦足以賅括之矣。况辨虛實。分氣血。論攻補。昔賢發明。尤多獨到之處。足補西醫之缺。而惜乎解人難索也。袁君桂生。吳中之名醫也。邃於醫學。立論平允。學術精堪。而感慨淋漓。保存國粹之盛心。躍然紙上。可謂先得我心者矣。頃郵示其所著叢桂草堂醫草。屬爲之序。瀏覽一通。見其辨症剴切。用方工穩。每述一病。原原本本。剖析無遺。洵足開學者之智慧。昔周學海氏有云。宋後醫書。惟案最好看。不似注釋古書之多穿鑿也。每部醫案中。必有一生最得力處。潛心研究。最能吸取衆家之所長。余按醫案一門。當推喻氏寓意草一書爲冠。蓋其

案雖僅六十二條。而反覆推論。務闡明其審症用藥之所以然。較之諸家醫案。但泛言某病用某藥而愈者。甚相懸殊。前清四庫全書提要。贊其極有發明。足資開悟。近代名醫如張石頑。葉香巖。顧松園。徐靈胎。尤在涇。俞東扶。吳鞠通。王孟英。林珮琴等。皆折衷其診病之法。默收治療之功。各發表於醫案之內。今袁君此書。即仿喻氏體例。而先議病。後議藥。悉遵喻氏法程。且其中有學宋人及金元諸家者。有學明人及清之張葉徐魏吳王諸家者。亦有運用經方及自出新意者。洵能萃衆家之長。而神明變化者矣。宜乎批卻導竅。而恢恢乎游刃有餘也。嗟乎。今之醫風。爾然頽敝極矣。出版之書。除一二釋本而外。幾如鳳毛麟角。而入主出奴。於今爲烈。滔滔天下。伊于胡底矣。安得全國醫家。皆如君者起而振此墜緒也。序君之書。蓋不禁百感橫集已。

民國四年六月廿八日越醫何肖巖廉臣書于紹城臥龍山麓之宣化坊

自序

予家自先伯父昌齡公。肆力於醫。而家君繼之。迄於今蓋四十年矣。猶憶十歲時。家君遽熱病。神識昏瞶。醫藥罔效。會先伯父自江南歸。投以三黃石膏湯。匝旬而起。又憶十二歲時。家弟濟生病中暑。壯熱譫語。面赤煩渴。時家君遠出未歸。延郡中某老醫治之。手甫按脈。卽大聲告曰。此兒之病。危在夜半。恐不治。翌日家君自外歸。命剖西瓜汁與飲。一汗而解。未嘗不歎醫藥之關繫如是其重。而專門名家之罕覩爲可憾也。十六歲後。先伯父以積勞病逝。家君又屢患肺病。欬嗽咯血。呻吟牀蓐。家庭之憂患日多。而予習醫之志。因是益堅。遂發家中藏書。朝夕玩誦。家君又時爲講解。每治難病。必撮其大要。舉以訓示。凡診察之奧窔。用藥之精微。與夫鑑別死生。暨寒熱攻補。先後之次序。皆瞭如指掌。老人諄諄。如蒙師之訓。學童寒暑靡間。樂此不疲。數年以後。於醫學始稍窺門徑。於是益蒐求舊籍。廣購新書。凡坊間罕見孤行之本。以及管趙諸氏所譯之西醫書。均羅而置諸几案間。參觀互證。久之遂別有會心。乃稍稍爲人醫治。丁未戊申兩年。前清兩淮鹽運使司趙都轉。與兩江總督端制軍。先後考試醫學。友人陳君瑞辰等。相約觀光。謬獲最優等證書。嗣僑寓京口。遂以醫問世。四方人士。不以予爲固陋。競來延診。由是益有所考鏡。既自幸。復自愧也。嘗觀吾國醫學之歷史。其學術精深之士。得力於社會箇人之傳習者爲多。而政府提倡之力較少焉。非在上者不知提倡也。人材之出。本於山川靈秀。况醫屬專門科學。非學問閱歷兼到。未易得其神髓。故吾國醫書。皆以私家之著作爲優。今雖世界交通。政治學術。多效法歐西。醫學一科。亦採用西法。顧吾以爲中華乃文明舊邦。先聖先賢所遺傳之醫學。自有其真精神在。決非他人之說所得而播撼之。今而後。欲求吾國醫學之發達。仍必賴私家之纂述以相爲輔助。予不敏。竊嘗有志於此。顧以茲事體大。尙須有待。去年十月。家弟濟生書來。囑將平時治驗方案。勒爲一書。以供研究。人事倥傯。未遑議及。今夏濟生復以爲言。而知交中亦有借鈔者。爰擇要編次。不分門類。題曰。叢桂草堂醫草。蓋仿盧氏之芷園臆草。與喻氏之寓意草云。雖區

區一得。未足方此二家。而十年經驗。或可謂醫林之借鏡歟。

中華民國三年歲在甲寅立冬前一日江都袁焯桂生氏識於京口寓次

叢桂草堂醫案卷一

江都袁 焯桂生著

紹興裘慶元吉生校

鎮郡陶駿聲君令閨。腫脹嘔吐。纏延月餘。先是胎前足腫。產後腫益甚。效嗽嘔吐。經此間諸名醫治之。疊進舟車丸。五皮飲。栝蒌薤白白酒湯。及八珍湯等弗效。且面目肢體悉腫。腹脹如鼓。效喘不得臥。嘔吐痰水。輒盈盆碗。吐後亦能飲食。診其脈弦滑而有胃氣。言語亦甚清晰。初用小半夏湯。加乾薑五味子。及厚朴半夏甘草人參湯。枳朮湯等。無大效。且嘔吐大發。其時有人薦他醫治之。亦無效。陶君復延予治。詢得其情。則從前延諸名醫時。亦時發時止。或吐或不吐。但每覺胸膈悶塞。則知病將復發。必吐出痰水數碗。然後始覺寬暢。近日又覺悶塞異常。呼吸幾不能通。今雖吐後。猶嫌悶塞。效嗽不得臥。予沉思久之。恍然曰。此肺中氣管爲痰飲閉塞。不得通也。氣管之所以閉塞者。緣腹脹溺少。胃中及膈膜間均爲痰飲充塞之地。膈中痰飲充塞。則溢於肺中氣管。肺中氣管亦充塞。則滿而悶塞不通。呼吸不利。內既充滿。則激而上出而爲嘔吐。以故盈盆盈碗。皆痰涎水沫。痰水既出。則膈膜肺胃等處皆鬆。故知饑能食。待數日後痰水聚多。又復作矣。是則此病之真諦也。治法以驅痰飲爲要。而驅肺中氣管之飲爲尤要。苦思半晌。爲立一方。用三子養親湯。合二陳湯。加麝香五釐和服。以白芥子能橫開肺中之飲。麝香香竅。能通氣管及膈膜間之閉塞。且能止吐。明日復診。述昨藥服後。覺藥性走竄不已。上竄至咽。下竄至小腹。胸部尤覺竄走。隨竄隨嘔。吐出痰涎甚多。半夜未能安枕。而胸悶覺寬。呼吸便利。嘔吐亦止。蓋氣管之閉塞通矣。遂以原方去麝香。接服三劑。而胸次大舒。效嗽亦減。仍以原方。加冬蟲夏草。北沙參。生薑。紅棗。又三劑而浮腫亦消。效嗽大定。但腹脹如故。堅滿不舒。乃停煎劑。每日單服禹餘糧丸二次。每服三錢。忌鹽醬等物。五日後脹漸消。十日後脹消及半。而精神疲憊。自覺心內及臟腑空虛。蓋飲滯消而氣血

虛也。令以前丸減半服。並以參朮歸芍山藥茯苓等煎劑相間服之。不十日而脹全消。病竟愈。聞者莫不歎服。迄今六年。病未復發。且已經孕育矣。

庚戌四月廣安祥糖棧袁堯寬君患溫病。初由章綬卿君診治。服藥數劑。病未大減。嗣章君往江北放賑。轉薦予治。壯熱譫語。見人則笑。口渴溲赤。每日祇能進薄粥湯少許。舌苔黃薄。而乾燥無津。體胖脈息滑數。右部尤甚。蓋溫病也。熱邪蘊伏日久。蓄之久而發之暴。故病情危重若是。治法當以解熱為主。而佐以豁痰潤燥。方用三黃石膏湯。合小陷胸湯。去麻黃。豆豉。半夏。加貝母連翹。青蒿。梨汁。接服二日。熱未大退。至第三劑後。乃作戰汗而解。但餘熱未清。復以前方去石膏。芩連。栝蒌。加苡仁。滑石。蘆根。花粉。沙參等清化餘邪。數劑而痊。凡溫病之解多從戰汗。劉河間。吳又可。發之於前。葉天士。王九峯。暢之於後。證以予所經歷。洵精確不易之學說也。蓋前人於此。皆從經驗中得來。惟必俟服藥多劑。始能奏功。而作汗之時。必先戰慄。其狀可駭。醫家當此。何可無定識定力耶。

金峙生君令堂。年近五旬。發熱身痛。舌苔白膩。溲熱胸悶脈滑。予初以三仁湯。加連翹。山梔。接服兩劑。熱愈甚。口渴心煩。舌苔轉燥。脈亦轉數。蓋伏邪病熱邪蘊伏甚重。遂易方以黃芩。栝蒌。地骨皮。青蒿。各三錢。連翹。知母。各四錢。木通一錢。銀柴胡二錢。蘆根。茅根。鮮生地。各一兩。梨汁一酒鍾和服。一劑熱少平。二劑後。病人忽戰慄惡寒。震動牀帳。蓋欲作戰汗也。病家誤會。謂藥之誤。議延他醫。幸其弟陶駿聲君來告。速予往救。予謂此戰汗也。病退之機。不可妄動。及予至其家。則戰慄已止。身出大汗。而脈靜身涼。神氣亦甚安靜。但覺疲倦而已。隨用薄粥湯與飲。以扶胃氣。並以沙參。麥冬。百合。苡仁。石斛。花粉。甘草。茯苓。等調養兩日而痊。

庚戌四月。史漢泉君患溫病。昏沉不語。面垢目赤。鼻孔如煙煤。壯熱燥手。汗濺濺然。舌苔黑燥。手臂搖擗。兩手脈數疾。溲赤。問不能言。幾日矣。曰。昨猶譫語。今始不能言。然大聲喚之。猶瞠目視人。問近日大便通否。曰。始病曾泄瀉。今不大便已三日矣。問服何藥。則取前醫之方示予。蓋皆不出銀翹散。三仁湯。增液湯之範圍。予謂此熱

病未用清藥。陽明熱極。胃家實之病也。非下不可。乃與調胃承氣湯。合三黃石膏湯。去麻黃。豆豉。加犀角。薑仁。接服兩劑。竟未得下。惟矢氣極臭。洩色若血。神識較清。而身熱舌黑如故。原方去元明粉。大黃。加鮮生地。並令恣飲梨汁。萊菔汁。於是熱減神清。黑苔漸退。脈息亦較平。時吐粘痰。目睛轉黃。遂改用小陷胸湯。加蘆根。茅根。青蒿。菖蒲。竹茹。貝母。冬瓜仁。木通。等芳香清冽之品。以分消膈中痰熱。接服四劑。胸部頸項間遍出白痞。如水晶珠。腹部腿畔亦發白痞。於是身熱全清。知饑進粥。但精神疲弱耳。復以西洋參。麥冬。石斛。苡母。竹茹。枇杷葉。等調養數日。始解黑燥屎數次。當時兩進大黃。而不下者。蓋其戚友中有知醫者。潛將大黃減去一錢。每劑祇用二錢。故但有解毒之功。而無攻下之力。而奏效亦較緩也。然究勝於粗工之濫用硝黃。而償事者矣。姚某子十五歲。三月間由學校歸家。自覺惡寒欲睡。旋即發熱頭痛。身痛譫語。不能識人。按其脈滑數。洩赤。當以梔豉湯銀翹散出入爲方。下午四時復診。神昏譫語如故。身熱自汗。澀澀然不止。面赤口渴欲飲水。脈息滑而不數。舌苔薄膩。不黃不燥。因思傷寒論云。陽明病。發熱汗多者急下之。而面赤神昏又皆當下之症。遂改用小承氣湯。大黃三錢。厚朴五分。枳殼二錢。加黃芩。連翹。知母。各二錢。服後解大便兩次。神清安睡。汗止熱解。自能起坐。知饑欲食。其家以爲病愈。不復延診。越三日復發熱有汗。口渴脈滑數。與白虎合小陷胸湯。石膏用三錢。服後熱退神清。惟效嗽痰中帶血而已。復與瀉白散加黃芩。知母。茅根。等二劑全愈。張兆魁君室人。年約三旬。體質瘦小。發熱譫語。口渴心煩。欲食冷物。胸悶洩熱。舌苔黃膩不燥。兩脈俱數。與小陷胸湯加柴胡。黃芩。不效。燒熱益甚。遂改用涼膈散大黃。元明粉各用三錢。服後得下兩次。並得戰汗。而熱全退。惟精神萎弱。懶於言動。復以黨參。麥冬。枸杞子。乾地黃。黃芪。炙甘草。等補養氣血之藥。兩劑而起居飲食如常矣。

鵠泰糖棧陳祝山。年約三旬。今年七月患伏暑病。延某醫診治。服藥四五日不效。壯熱頭疼。胸悶咽喉作燥。口渴舌絳苔薄焦燥無津。大便七八日不通。洩赤脈數。蓋暑熱蘊伏腸胃熱結之病。治法當先通大便。以解腸胃之

焚。乃以生大黃二錢。元明粉三錢。枳殼。黃芩。麥冬。天花粉。各二錢。甘草五分。此藥服後。得大便兩次。熱全退。頭痛亦輕。舌苔轉白膩。脈緩不數。小便仍紅。知饑欲食。乃易方以連翹。苡仁。佩蘭。花粉。沙參。貝母等以解餘邪。越兩日。又復發熱。口渴胸悶。是餘邪欲出也。以小陷胸湯。合小柴胡湯。去人參薑棗。加連翹。青蒿。接服兩劑。得汗而安。大凡應用硝黃之病。決非他藥所能代。若畏而不用。必致纏延誤事。但須辨認真切。用之有方。不可顛覆孟浪耳。

丁未夏月。予遊吳門。適該處霍亂流行。死亡接踵。有神仙廟旁紙店孀婦。亦染此病。吐瀉交作。醫投五苓散。玉樞丹。附子理中湯。左金丸等法。入口即吐。已延三日。視其目陷形消。四肢逆冷。心煩不能安臥。口苦渴欲冷飲。舌紅根有膩苔。頭有微汗。兩脈皆數。重按無神。蓋暑病也。與黃連香薷飲。去厚朴。加苡仁。蠶沙。半夏。石斛。沙參。黃柏。枇杷葉。服後吐止神安。手足轉溫。二劑利減。能進粥湯。嗣以前方去黃柏。蠶沙。減輕川連。利止。惟心悸腰痠。頭暈精神疲憊。不能起坐。兩脈細小。此病去而氣血虛也。以西洋參。白朮。石斛。山藥。杜仲。棗仁。茯神。當歸。甘草。紅棗等。調補三日而痊。

蘇州閭門外營盤場。有程姓少年。亦病霍亂。吐瀉不已。煩躁畏熱。身無寸縷。而猶畏熱異常。欲臥冷地。四肢悉冷。胸腹部亦均不熱。口渴欲食西瓜。小便短赤。頭項微汗。脚腓痠攣。脈息寸關俱數。舌苔黃燥無津。此暑熱內伏。熱深厥深。內真熱而外假寒之病也。乃以白虎湯。合黃連香薷飲。去厚朴。粳米。加麥冬。苡仁。石斛。陰陽水煎。一服吐止。再劑利亦止。而煩渴亦大定矣。惟肢體尚冷。囑以稀粥與飲。安睡一夜。體溫遂復常度。於是但以飲食調養。不勞他藥而瘳。

徐某年約三旬。秋間陡患腹痛吐利。發熱口渴。煩躁不安。舌苔黃膩。脈息滑數。蓋暑濕蘊伏中焦腸胃中有宿滯也。與黃連香薷飲。合平胃散。一服吐利止。身熱退。接服一劑。知饑欲食矣。大凡黃連石膏之病。其舌苔必黃膩。或黃燥。其小便亦必紅赤。若小便清長舌光無苔。則膏連二藥皆爲禁劑。蓋舌質之光否可覘胃臟之虛實也。

朱姓子八歲。秋間病霍亂。吐瀉。手足悉冷。口渴。欲飲水。目陷形消。不食不饑。舌苔黃膩。脈息小數。用薑汁炒川連三分。法半夏一錢。扁豆三錢。苡仁三錢。木香五分。北沙參二錢。服後吐瀉止。手足溫。舌苔亦退。能進稀粥。但口渴殊甚。遂改用麥冬。天花粉。各一錢五分。北沙參二錢。白朮一錢。苡仁。扁豆。各三錢。兩劑瘡。

張姓婦年四十餘。先於四月間病心悸怔忡。頭眩發熱。予以天王補心丹。加青蒿。地骨。等藥治愈矣。及至夏間。陡患腹痛上衝於心。嘔吐清水。下利紅白。痛甚則手足俱冷。汗出神疲。按其脈沉遲而小。望其色則面白唇淡。蓋陽虛中寒之病。始由乘涼飲冷所致。問之果連日臥竹牀乘涼。且稍食西瓜等物也。與附子理中湯。加吳茱萸。桂枝。白芍。砂仁。一服痛稍緩。兩劑痛始平。手足溫。遂以原方去附子。減輕薑莢。自是利止食進。復以歸芍六君子湯。調治數日而痊。

詹雲溪先生幼子。甫生數月。夏間因服荷葉露。銀花露。過多。下利手冷。面色晄白。口吐涎沫。其家以爲難活矣。予用理中湯。加丁香。減小其劑。一服利止。而涎沫亦不吐矣。二服神氣充。手轉溫。復以五味異功散。培養胃氣而安。今已十歲。爲小學校之學生矣。

張星五大令。紹興桐城人。辛崑山時。其如君年四十餘。患血崩症。經醫治愈。自是遂不能寐。精神疲憊。飲食不多。延予治之。左脈細小。心脈尤弱。臍左有動氣勃勃。甚則上衝。心悸多汗。頸胸間嘗覺筋掣。蓋血舍空虛。筋無血養。而虛陽不能斂納也。乃與阿膠鷄子黃湯合三甲腹脈湯。加女貞子。枸杞子。棗仁。茯神。栢子仁等。接服五劑。諸症稍退。夜間亦稍能寐。遂接服五十五劑。病大退。飲食亦較多矣。嗣以原方加生地。熟地。製成膏劑。常服全瘳。

庚戌三月。葉姓婦臥病垂危。其子來邀予診。行色愴惶。口稱已經某醫診治數日。稱爲不治。並求速往。視之果神色大衰。時出冷汗。手冷額冷。面色萎黃。心悸頭暈。精神不支。脈息小弱。蓋陽氣大虛。亡陽在即之危候也。遂以四逆加人參湯。再加黃芪。白朮。棗仁。白芍。紅棗等。薑附各用一錢五分。參芪朮均用三錢。急煎與服。旋即汗止。

手溫。神氣亦轉。能進米粥。原方去附子。稍輕其劑。接服三日全安。

朱姓婦因病小產。旋即手冷惡寒。自汗不止。胸悶不欲食。脈息栗滑而小。舌苔薄白。此產後陽虛。而兼有痰濕阻滯也。用黃芪建中湯。去飴糖。加橘皮。半夏。一劑汗收手暖。二劑全愈。

壬寅臘月。家慈因侍先外祖母病。乃經營喪葬事。悲勞過度。復冒風雪。遂患關節疼痛。不能起於牀。服千金獨活寄生湯數劑。痛止。亦稍稍能起坐矣。越兩日晨間。忽大汗淋漓。目直視。手冷。家人見之。惶駭不已。以爲不祥之徵也。家君入視後。取吉林人參半枝。紅棗約十數枚。急火煎服。纔下咽而神色即覺寧靖。汗亦漸收。復以理中湯。加黃芪。接服兩日而安。距今已十三年。未嘗患病。此亦予家得力於醫之一事也。

方兆珍君令媳。年二十餘。臥病經旬。服藥多劑。而煩躁譫語。卒不能平。延予治之。見躁擾不安。妄言罵詈。欲食冷物。手冷脈息沉弱。口雖渴而不能飲。唇雖焦而舌則潤澤。且舌色不紅。面色黃淡。身不發熱。予謂此虛寒病也。殆寒涼發散太過乎。檢閱前方。果皆苓連羌活枯薑海石之類。病家間既係寒病。何以煩躁欲食冷物。而譫語不能寐也。予應之曰。寒病有常有變。凡惡寒手冷。下利清穀。口中和。而不渴者。此其常也。若躁擾不安。欲臥冷地。欲食冷物。則其變也。何謂之變。以其寒病而反現熱象也。其所以現此熱象者。因陽氣虛寒。龍雷之火浮越於外。古人所謂陰勝格陽。又曰內真寒而外假熱之病也。治宜引火歸元。否則涼藥入口。則立斃矣。乃與四逆湯。乾薑。附子。各二錢。加肉桂八分。黨參。白朮。熟地。棗仁。茯神。各三錢。煎成冷服。果躁擾漸寧。接服一劑。能安睡矣。自是神安能食。不復罵詈。復以歸芍六君子湯。調補數日而痊。

王姓老婦。年約六旬。偶病感冒。醫者以發散藥與之。次日遂發狂奔走。欲脫去上下衣服。欲臥冷地。其子惶駭。延予診之。予視其面色黃淡。手足俱冷。脈息沉弱。是陽虛欲脫也。急以四逆湯。加黨參。熟地。肉桂。兩劑而安。嗣以人參養榮湯。調補數日乃痊。

壬子正月。利記糖棧駱達三君。患感冒病。頭痛惡寒。飲食無味。脈息小滑。予用葱豉湯。加荊芥。紫蘇。半夏。橘皮等。

記此藥服後忽喘息不能臥。頭腦中覺熱氣上升。小腹左偏作痛。嘔吐痰水。畏寒。手足指厥冷。肋底彷彿。蓋陽受寒之病。得發散而陽氣益虛也。其頭腦中覺熱氣上升者。腦力素衰。寒氣逼龍雷之火上越也。其喘息不能臥者。肺腎兩虛。不能納氣也。其腹痛嘔吐痰水者。寒氣內擾。氣血不能通調也。其畏寒手指作冷者。虛寒病之本相也。乃與理中湯合六君子湯。加肉桂。白芍。五味子。服後喘吐俱平。腹痛亦止。能進稀粥半碗。但仍覺畏寒。手冷。益信爲陽虛矣。仍用前方。去茯苓。橘皮。加熟地。服後諸症悉退。病家自以爲病愈。遂不服藥。越數日復惡寒。頭痛手冷。時或手足發熱。精神疲倦。不思飲食。舌苔少而色白。小便黃。脈仍沉小。乃以理中湯合小建中湯。去飴糖。加半夏。服後諸症少退。但時覺虛火上升。則頭痛大作。手足亦覺發熱。而其身則殊不熱。遂師李東垣法。用路黨參。白朮。各二錢。肉桂五分。升麻。柴胡。川芎。各一錢。炙甘草八分。茯苓三錢。半夏一錢五分。加生薑。紅棗。同煎。覆盃而頭痛止。手足亦不發熱。接服一劑而安。凡老年之病屬虛者多。非偏於陽虛。即偏於陰虛。而亦有陰陽兩虛者。醫家於此。尤宜加意焉。

盧谷山年近六旬。患泄瀉。由夏炳如先生介紹邀診。脈息小弱。兩手俱冷。精神疲倦。此脾胃氣虛。陽氣衰弱之病。乃用理中湯。加山藥。木香。接服兩劑。精神較好。能進飲食。原方加肉桂四分。枸杞子二錢。又服二劑。手稍轉溫。泄瀉已止。但頭眩殊甚。原方去薑桂。加熟地。接服三日。頭眩較減。而手仍冷。復於原方中加鹿角膠。黃芪。服兩劑後。精神殊覺爽健。惟手終不暖。蓋高年真火已衰。非旦夕所能奏功。乃囑購鹿茸半具。研末。每日服五釐。用高麗參三錢。煎湯和服。盧君遂託友在滬購辦參茸。如法服之。半月後返閩。今年春間。盧君復來鎮江。言鹿茸甚有效。現在精神甚好。而手亦轉溫。今擔任賴大有皮絲煙號經理云云。大凡積虛之病。皆須悠久成功。而尤必藉血肉有情之品。始易奏效。鹿性純陽。能補人身陽氣。茸生於首。兼能補腦。故有此特效也。

乙巳二月。季姓婦。咳嗽倚息不得臥。惡寒發熱。頭疼身痛。胸悶不舒。心痛徹背。脈沉而滑。舌苔白膩。此風寒痰飲。內外搏結。肺氣不得下降而成肺脹也。乃用小青龍湯。合栝蒌薤白湯。麻黃。細辛。各四分。乾薑。五味子。各五分。

栝蘤。薤白。各三錢。甘草。五分。餘藥各一錢五分。服後得汗。而寒熱喘息俱平。惟身痛。欬嗽未已。易方以桂枝湯。和營衛。加乾蘤。五味子。各五分。細辛三分。以治欬。一劑效。因貧不復延診。遂漸愈。

吳某年十五歲。欬嗽音嘎。自春徂秋。迄未能愈。欬而無痰。飲食能進。不熱不渴。脈如平人。與三拗湯。加乾蘤。五味子。半夏。服三劑後。欬減。聲音如常。每次麻黃祇用三分。至第四劑則減至二分。後以大君子湯。調補三日而瘳。劉某病延兩月。欬嗽吐痰甚臭。身熱口渴。手足心熱。舌紅無苔。右脈滑數。此肺臟伏熱。勢將成癰也。與黃芩。貝母。玉竹。蘤仁。桑葉。知母。枇杷葉等作煎劑。加梨汁和服。一劑熱輕。嗽減。三劑全愈。

鮑姓子三歲。發熱數日。欬吐臭痰。大便完穀不化。捫其額熱燥手。舌乾苔少。口渴脈數。乃肺臟受熱也。擬方用黃芩。馬兜鈴。地骨皮。知母。貝母。栝蘤。苡仁。桑葉。甘草。枇杷葉。一劑知。二劑已。

孫姓婦年四十餘。素有肺病。欬嗽痰中帶血。頭暈心悸。徹夜不寐。精神疲憊。心內覺熱。飲食不多。脈息細弱。此平日勞神太過。血液衰耗。肺病日久。將成肺癆也。擬方用百合。棗仁。茯神。栢子仁。各三錢。沙參。麥冬。地黃。各二錢。阿膠。一錢五分。服後血止能寐。但汗多氣喘。原方去百合加黃芪五分。枸杞子二錢。浮麥三錢。胡桃肉三錢。接服兩劑。汗收喘定。但尚有欬嗽而已。原方去黃芪。加地骨皮。貝母。枇杷葉。服三劑後。欬大減。精神亦健。能乘輿出門。遂改用集靈膏。令其常服而痊。

劉錫九君。咳嗽多日。音嘎。起居如常。體胖脈息緩滑。舌有膩苔。蓋痰飲病也。與二陳湯。加白芥子六分。白朮二錢。苡仁三錢。三服而瘳。

周珊甫君夫人。年逾五旬。素患肺病。欬嗽哮喘。痰聲如拽鋸。呼吸幾不能通。予視其體胖神強。兩手脈滑有神。蓋富裕之家。奉養太過。肥甘油膩。蘊釀成痰。致肺氣管枝發炎也。擬方用杏仁泥。白前。桔梗。各一錢五分。薄荷五分。橘紅八分。貝母。苡仁各三錢。茯苓二錢。甘草五分。枇杷葉一片。作煎劑。一服呼吸大暢。哮喘亦定。接服三劑全愈。

孫姓女。甫週歲。欬嗽多日。初延西醫某治之。無大效。後延中醫某治之。亦無效。因來求診。予見其精神疲憊。面色淡白。舌紅無苔。滿舌俱破。有汗不熱。乃虛症也。用生脈散。加百合。元參。扁豆等作煎劑。初次僅用沙參。接服兩劑。欬嗽大減。神氣亦佳。惟夜間汗多。原方加黃芪一錢。浮小麥三錢。改用黨參。又兩劑。欬嗽亦減。舌破亦愈。其舌上亦并未用吹藥也。

龍耀南君夫人。欬嗽多日。時發寒熱。舌光無苔。脈息濡緩。與生脈散。加青蒿。黃芩。苡仁。百合。貝母。枇杷葉。接服兩劑。寒熱退。欬嗽亦減。惟目光不足。視物昏花。原方去青蒿。黃芩。苡仁。加乾地黃。女貞子。三劑而痊。

叢桂草堂醫案卷二

江都袁 焯桂生著

紹興裘慶元吉生校

癸丑冬月。裕大昌木行。伊君夫人。年二十六歲。懷孕三月。驟然腹痛下血。既痛且脹。痛甚則頭出冷汗。手冷鼻冷。胸悶嘔吐。前後陰皆阻脹不堪。左手脈伏不現。右脈弱小。面色淡黃白而無光采。舌色淡無苔。此氣血虛寒之象。始由勞力受寒使然。蓋中下焦陽氣不足。腹部受寒。則血脈流行阻滯而爲痛脹。胃臟受寒。則消化停阻而嘔吐。子宮之血管破裂則下血。左手脈伏者。血爲寒凝。營衛之功用失常度也。右脈弱小者。氣血虛寒之本相也。前後陰與腹部阻脹拒按者。血爲寒凝。陽氣不能運行也。額冷鼻冷手冷面色無神者。亦皆虛寒之本色也。其病始與傷寒直中陰經無異。特孕婦之病。又兼漏下。與常人異耳。問之。果因送其伯父之殯。夜間操麻雀牌未眠。黎明乘輿登山。飽受風寒。歸家卽病。擬方以膠艾湯。合建中湯法。當歸。地黃。各四錢。川芎二錢。阿膠三錢。以止血安胎。肉桂八分。製附子一錢五分。桂枝二錢。炒白芍三錢。以回陽止痛。而散寒邪。砂仁一錢。木香一錢五分。以溫胃消滯。而通阻脹。黨參三錢。紅棗三枚。生薑三片。以扶元氣而和營衛。作煎劑服。明日復診。痛脹均大退。嘔吐亦止。能對予發言。亦能進粥。左脈亦現。面色亦較有生氣。但下血未止。心內常覺空虛。乃以原方去木香。砂仁。桂枝。川芎。并稍減桂附。改地黃爲熟地。而當歸亦減用二錢。加枸杞子三錢。茴香二錢。接服三劑。飲食起居。略如平人矣。一月後。始強健。而胎則杳然。蓋下血時已隨波而墮矣。

金平卿君哲嗣。年八歲。體質素瘦。今年三月出痧。痧後又生泡瘡。至六月初旬。又病喉痧。發熱咽痛。初由西醫蔣某治之。用冷水浸毛巾罨頸項。又用水浴法。及服安知必林。與鹽剝水漱喉等法。均無效。病勢益劇。其岳家童姓薦予治。時六月十五日也。身熱咽喉兩旁上下皆潰爛腐穢。舌紅無苔。口渴。溲黃。脈息戛數。蓋陰液大虧。熱